

**Perdana Menteri Sentiasa Penuhi Permintaan Masyarakat India  
Bernama  
24 September , 2011**

PUTRAJAYA, 24 Sept (Bernama) -- Perdana Menteri Datuk Seri Najib Tun Razak sentiasa memenuhi permintaan masyarakat India bagi memastikan mereka terus berada dalam arus pembangunan negara, kata Presiden MIC Senator Datuk G. Palanivel.

Palanivel, yang juga Menteri di Jabatan Perdana Menteri, berkata masyarakat India secara umumnya kini sedang merasai usaha dan kesungguhan Perdana Menteri dalam membantu masyarakat India terutamanya dalam menyelesaikan pelbagai masalah yang membelenggu kaum ketiga terbesar di negara ini.

"Perdana Menteri banyak membantu masyarakat India. Kadang kala kita tak boleh umum semua itu secara terbuka. Setiap kali kita minta, beliau membantu kita (masyarakat India). Ia dirasai oleh masyarakat India sendiri ketika ini," katanya kepada pemberita selepas merasmikan seminar untuk memperkasakan koperasi, di sini hari ini.

Turut bersama ialah Menteri Sumber Manusia Datuk Dr S. Subramaniam.

Seminar anjuran Jawatankuasa Kabinet Masyarakat India itu dihadiri lebih 300 anggota Koperasi India dari seluruh negara.

Mengenai harapan MIC dan masyarakat India dalam Belanjawan 2012, Palanivel berkata MIC telah mengemukakan perkara penting untuk perhatian Najib yang juga Menteri Kewangan.

"Biar Perdana Menteri umum sendiri. Kita telah mengemukakan beberapa cadangan dan kita tahu beliau sentiasa membantu masyarakat India," katanya.

Mengenai gerakan koperasi, Palanivel berkata koperasi-koperasi India hendaklah menggunakan kreativiti dan inovasi untuk memperkembangkan perniagaan dan pendapatan mereka.

Katanya daripada 80 buah koperasi yang mewakili masyarakat India, 12 koperasi menunjukkan daya saing yang tinggi dan berjaya mencapai keuntungan.

Katanya MIC juga sedang berusaha menubuhkan sebuah koperasi yang diberi nama Koperasi Suriya untuk membantu koperasi-koperasi kecil India di negara ini.

---BERNAMA

Hakcipta © 2011 BERNAMA

Source: <http://www.bernama.com/bernama/v5/bm/newsindex.php?id=615536>